



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10



Taliban-i Afghanistan commander Ismail Khan puogo



Thomas-i India tetsur football team head coach inyaksü

VOL. XVIII NO. 301 (ADOK 301) DIMAPUR

KÜPTOKNÜ (SATURDAY)

LUROI (AUGUST) 14, 2021 ₹ 5.00

## COVID-19 Nagaland: Nisung 29,000 tema dak putetogo

**Kohima, August 13, 2021 (TYO):** Hokolbarnü Nagaland nung nisung 81 dak COVID-19 puteta 29,000 adenogo aser külen nisung 81 taneptsü angu. "Tanü nisung 81 dak COVID-19 putet. Parnokji Mokokchung nung 24, Dimapur nung 19, Kohima nung 11, Tuensang nung 8, Peren o Wokha nung trokrok (6), Zunheboto nung 4 aser Kiphire, Longleng o Mon nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, tanü COVID-19 puteta alir nisung 81 taneptsü angu. Parnokji Kohima nung 34, Peren nung 15, Dimapur o Longleng nung terer (10), Mokokchung nung 9, Tuensang nung 2 aser Kiphire nung 1 lir" ta paisa ashi.

Tanü putetertem züngsema nisung 29,036 dak COVID-19 putetogo aser iba nungi nisung 26,264 taneptsü nguogo.

Nagaland nung COVID-19 nungi taneptsü angur 90.45% lir aser tang 1,346 anepaludar, ta paisa ashi.

"Hokolbarnü Dimapur nung

COVID-19 puteta alir ka asü aser iba nisung züngsema tasür ajak agi 592 kümogo, saka nisung 14 bo tanga tashidak ajanga asü" ta Dr Kikon-isa ashi. "Tang tashi nung COVID-19 alitsü akok ta temolung melemi bilemba sample 285,068 tendangogo. RT-PCR ajanga 104,571, TrueNat ajanga 70,819 aser Rapid Antigen Test ajanga 109,678 tendang" ta paisa metetdaksü.

Brihostibar tashi nung Nagaland nung nisung 637,278 nem COVID-19 vaccine indang dose 803,816 agütsüogo, ta State Immunization Officer Dr Ritu Thurr-i ashi.

Parnokji frontline workers 60,837, healthcare workers 15,985, arishi küm 45 ser tempur 189,195 aser arishi küm 18 nungi 44 tsüngda alir 371,261 lir, ta paisa ashi.

"Vaccine agirtem rongnung nisung 166,538-i dose anaprong agiogo. Parnokji frontline workers 41,803, healthcare workers 12,723, arishi küm 45 ser tempur 107,041 aser arishi küm 18 nungi 44 tsüngda alir 4,971 lir" ta Dr Thurr-isa metetdaksü.

## Nagaland sorkari COVID atema district shia dangi ketdangsürtem yoker

**Dimapur, August 13, 2021 (TYO):** Nagaland nung Health & Family Welfare Department-i district shia nung Covid-19 wara dak sendakba maparen reprangshitsü atema tongti ketdangsür anana mapa lezmüksüogo.

Nagaland sorkari district shia H&FW department nungi tongti ketdangsür aser senior administrative officer ka yoktsü.

Ketdangsürtem lezmükba district nung District Task Force, civil society teloktem aser tangartem den ajurutepa osang metetpelatsü aser Covid-19 aziüoktsü atema inyakba mapa len ania yariteptsü.

Nagaland nung Covid-19 wara tasembuba adok nungbo ta ser state sorkari district ajak nung Covid tendangba, vaccine agütsüba aser healthcare infrastructure tashitaiba kümdaksüogo.

State ajungalen Covid-19 kanga junga aziüoktsü atema sokari tongti ketdangsürtem mapa lezmüksütsü telemtetba agi.

Hokolbarnü Nagaland Civil Secretariat indang secretariat conference hall nung district shia atema shimba ketdangsürtem asoshi orientation programme ka ayonga agi.

Iba mapang Chief Secretary J Alam-i ketdangsürtem dang NGOs, civil society teloktem, tamangba yimsü dak sendakba teloktem aser yimten lenirtem teyari agia mapa inyaksü ayongzük.

"Covid-19 tensa tajungba nung aziüoktsü atema aser ano wara tasembuba adokra renema alitsü atema ketdangsürtemi kanga junga maparen shisadangtsüla aser inyakyim meyipa reprangshitsüla" ta Chief Secretary J Alam-i ashi.

## Assam Assembly-i Assam Cattle Preservation Bill, 2021 agizükogo

BJP MLA temi 'Jai Sri Ram' ayimtena agizük; Opposition-i temelenshitsu onük 75 benok

**Guwahati, August 13, 2021 (Agencies):** Hokolbarnü Assam Assembly Budget Session 2021-22 nung Assam Cattle Preservation Bill, 2021 agizükogo.

Tanü Assam Chief Minister Himanta Biswa Sarma-i bill benoka liasü aser ashishitep aketba bill nung temelenshitsu onük 75 shi agütsüogo.


Assam Cattle Preservation Bill ajanga nashishi machirtem alidak nashi tepsetba aser nashishi ayokba noktangtsü.

Bangdak ketdangpurtemi melaba teseitem dak alia tangalen nisung shingaiia nashishi agi yangluba kecha mayoktsü, ta Bill nungsa lateta lir.

Hindu, Sikh aser Jain nunger tekülem ki nungi kilometer 5 telongtet nung nashi metepsettsü aser mayoktsü, ta bill nungsa benoka lir.

Bill nungsa licenced mesüra recognised slaughterhouses-i dang nashi tepsettsü melar ta shia lir.

Kulikaket tejangia melii Assam nung aser tangalen nungi bener aruba nashitem noktangtsü.



Ajisüaka, aluyimba nung amshitsü atemabo district telongtet nung nashi belentsü akok.

District sasep nung registered animal markets nungi nashi ayoktsü aser alitsü atema bener senzütsü akok, saka kasa mapa ateam district o district tsüngda aser state adena bener aotsü atemabo kulikaket tejangia nungdaksü, ta Assam Cattle Preservation Bill nungsa benoka lir.

Aibelenertem tepuokdak küm 3 bosa ayutsü mesüra Rs 3 lakh aser Rs 5 lakh tsüngda senchi achitsü mesüra temerenshi anaprong angutsü akok ta bill nungsa shia lir.

Hokolbarnü Assam Assembly nung The Assam Cattle Preservation Bill 2021 agizükdang BJP MLA temi Jai Sri

Ram ayimten. Tanü nikongdang 5:30 ako meta Assembly-i iba bill agizüka liasü. Iba mapang BJP MLA temi Jai Sri Ram ayimten saka opposition MLA tem kimai luadok.

Opposition-i iba bill ya Selects Committee dangi abentsü mepishi saka Speaker Biswajit Daimary-i ibaji magizükba atema tejashi nung Opposition MLA tem assembly nung medeni kimai alu.

"India ya secular linük ka lir saka BJP-i ibaji raksatsütsü tasa lir. Parnoki yamai inyaker" ta AIUDF MLA, Sherman Ali-i ashi.

Opposition-i bill nung temelenshitsu onük 75 tashi agütsü saka item onük kar dak alaka aika mejembitet.

"MLA temi senden nung medenra, nenoki temelenshitsu onük benokba magizüktsüsa akümtsü" ta Speaker Daimary-i ashi.

Ajisüaka, opposition MLA temi tejashi sayua kimai alu aser iba ajanga Assembly nung bill kanga melamela agizüka liasü.

## H&FW Minister-i COVID-19 wara anema inyaka aruba metetdaksür

**Dimapur, August 13, 2021 (TYO):** COVID-19 wara tanabuba ajanga Nagaland nung kanga mejungi kongshi. Yaküm April-July 2021 tsüngda nisung 11,927 dak puteta liasü saka taküm kasa mapang nisung 15,600 dak putet. COVID-19 wara mezüngbuba nung positivity rate 9.7% dang liasü saka April-July 2021 nungbo 11.5% liasü, ta tanü Health & Family Welfare Minister, S. Pangnyu Phom-i ashi.

COVID virus menatepba aziüoktsü atema taküm sorkari lockdown benok aser 2020 küm mapa tasen 390 adokba nung nisungtem shimok. Iba dakji alia Health Care Workers indang mapa tazüng adokba 150 nung nisungtem shimokogo, ta pai metetdaksü.

State sorkari Nagaland nung yipden 1153 tashi kümdaksü. Itemji oxygen aliba yipden 669, oxygen maliba yipden 296, ventilators maliba ICU yipden 99

aser ventilators aliba yipden ICU 89 lir. Ano, CIHSR Dimapur nung yipden 200 aliba mozü ki ka yangludar aser September nungbo lapoktsü imlar.

COVID-19 agi shirangertem yariba nung oxygen kanga nungdaker. Yaküm wara tenzükdangbo cylinders 1417 dang liasü saka tangbo cylinders 6000 jungnüa kümogo. Ano, Kohima, Dimapur, Mokokchung, Tuensang aser Phek nung PSA Oxygen Generation Plants amenokogo. September ita tashi nung district ajak nung PSA plants amenoktsü sentong lir, ta Minister Pangnyu-i ashi.

Nagaland nung oxygen concentrators 2000 den teimba lir aser item ya sorkari alizükba aser ano tangari agütsübatem lir. Oxygen supply shitak ayutsü atema Dimapur nung State Depot

aser Mokokchung nung Zonal Depot lapoka lir, ta paisa shisem.

BSL laboratory 3 yangluba den külemi Nagaland ajungalen Truenat 32 aser Rapid Antigen Testing facility 362 tashi lapokogo. TATA MD den yaritepa district ajak nung RTPCR mesüra iba mesükba test facilities yanglutsü.

August 10, 2021 tashi nung nisung 6,32,435 (eligible Population nungi 51.17%) nem vaccine agütsüogo aser iba nungi nisung 1,60,437 (13%)-i dose anaprong agiogo.

H&FW nung senior Director ka lenisüba kübok Pediatric Task Force ka tentetogo aser parnoki asen state nung COVID wara tasembuba atema renemshiba maparen reprangshimtsü, ta H&FW Minister-isa metetdaksü.

### August 12, 2021 tashi nung Data:

| Tested Till Date | Positive Cases | Positivity Rate |
|------------------|----------------|-----------------|
| 1st Wave         | 120,246        | 11,927 9.91%    |
| 2nd Wave         | 164,822        | 17,028 10.33%   |

## Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nunger ama melentepa tamshi. Mozü achitsü agüja lira, aji shitak chiang. Tango junga mesashiteta, teku ashiba, aketba aser temang metaba timtem lira yakta doctor bushiang.



Tir Yimiyim

## Power Department ajanga Dimapur nung aliba nüburtem ayongzüker

**Dimapur, Luroi/August 13 (TYO):** Dimapur district nung power ayuaba azüoktsü aser revenue bendenba tajungba akumtsü atema Department-i mera alakteta kar agitsü, ta Principal Secretary, Power Department, KD Vizo-i sangdong ka nung ashi.

Iba atema Power Department indang Additional Secretary-i anir special team kati hopta ana nung Dimapur district khen semdanga power ayuaba azüoktsü aser revenue bendenba tajungba kuma renloktsü asoshi lenmang bushitsü.

Power ayuaba azüoktsü asoshi mera balala agiba dak alaka special team yagi Dimapur

asert Chumukedima Electrical Division tem nung aliba office aser field staff tem mapai aruba indang mita reprangtsü, ta ashi.

Iba team yagi Dimapur nung aliba nüburtem nem 'pre-paid metering system' agizükdaktsütsü aser energy kumzuka amshitsü yimyatem angazükdaktsütsü aser electrical consumer temi pei agiba menoktsü yimyatem sayutsü.

State dangi bener aruba power shilem 50 dak tema Dimapur district ajanga agir, aser Dimapur district nung power tali auya agiba ajanga Power Department indang power revenue nung metokmeperi ajurur aser iba

tenza azüoktsü rongdak nungdak ka kumogo, ta ashi.

Technical tsütsü tim teinyaktsü inyakogo aser power auya atsükba/agiba ya azüokteta aser tim yimya nung energy kumzuka ayutsü meratem agira, Dimapur district nung overloading mesüra load shedding malitsü, ta ashi.

Anungji Department ajanga Dimapur district nung aliba nüburtem ayuaba azüoktsü ayongzüker, aji asünung dang masüba nung overloading mesüra load shedding malitsü aser Department-i nüburtem nem service tajungba agütsütetsü, ta sangdong ajanga ashi.

## ANCSU-i coaching institutes tem sorkar tazüokba küboki aidaktsütsü mepeshi

**Dimapur, Luroi/August 13 (TYO):** All Nagaland College Students' Union (ANCSU)-i sangdong ka ajanga, coaching institutes tem state sorkar tazüokba küboki aidaktsütsü mepeshia metetdaktsüogo.

ANCSU-i ashiba agi, Nagaland nung coaching institutes balala amenokba ajanga kaket shisatsü bushiba nung state renloka aoba nung teyari agüja arudar aser kasa mapang nung item shisaluyim dak ajanga allied courses, competitive tatidang aser technical tatidang tem nung kaketshirtem nem teyari tulu

agüja arudar. Item shisaluyim dak balala ajanga kaketshirtem aser tatidang balala atema renemshirtem nem teyari agütsüba tenüing asangtsü langa lir.

ANCSU-i item shisaluyim dak ya tanga educational institutes tem dang nungi tajemba masü ta asatetogo aser parnok inyakyim tushitsü langa lir ta bilemer, ajisüaka kasa mapang nung item shisaluyim dak balala ya state educational regulation/authority küboki aitsü nungdaker.

Item shisaluyim dak karbo tangari senotsü teyari agüja

amenokba, kar pei sasa aser kar tanga nungtugu institutes tem den longjemer amenokba lir. Temetetsü kaji item coaching institute tem ya state indang authority/regulation/educational department küboki ait mali. Anungji ANCSU-i state sorkar dang item shisaluyim dak ajak züngoksemdaktsütsü aser kecha tetsükdaktsü makai inyaksangshidaktsütsü atema asadanga alitsü benokdangogo, ta ANCSU Tir Vimetiekho Vitso aser General Secretary Imnameren N Jamir nati külem sangdong ka ajanga metetdaktsü.

## Civil Secretariat nung inyaker nem I-Day atema metetdaktsür

**Dimapur, Luroi/August 13 (TYO):** State level nung 75 buba Independence Day sentong ya Nagaland Civil Secretariat Plaza nung August 15, 2021 nü agitsü renema lir.

Iba sentong nungya Nagaland Civil Secretariat nung inyaker officer aser staff ajak arua adentsüla, ta sangdong ka nung metetdaktsü.

Iba sentong nung adeni aotsü asoshi staff temi Secretariat bus amshitsü akok, koba August 15

anepdang 8:00 ako nung pei 'pick up points' nungi ayamesotsü. Secretariat indang ketdangsurtema iba sentong nung arua adentsü totuyuba agütsüogo, koba Secretariat Plaza nung agitsü lir.

Department shia nungi staff tem arua iba sentong nung adenba metetsü asoshi Administrative Heads of Department ajanga dang mera agitsü metetdaktsüogo aser attendance sheet ya Home

Department nem agütsütsü. Nagaland Civil Secretariat indang Grade IV staff tem iba sentong nung adener tenüing bendentsü asoshi Supervisor nem nungloktsüogo, ta ashi.

Iba sentong nung adenba officer aser staff temi mapang ajak nung COVID-19 nungi jenbua alitsü meratem agia mask agitsü aser social distancing yimya amala amshitsü amanger, ta sangdong ajangasa ashi.

## DAY-NSRLM, Mkg ajanga training agütsü

**Dimapur, Luroi/August 13 (TYO):** India nung nujiso ngur küm 75 ajungba 'Azadi Ki Amrit Mahotsav' benjongmung nungtem nung DAY-Nagaland State Rural Livelihoods Mission (NSRLM), DMMU, DRDA Mokokchung

District ajanga Common Service Centre (CSC) den lungjemer Biometric Fingerprint Device lemtsüba aser BC/Digi pay Sakhis amshiyim angazükdaktsüba sentong ka DRDA nung August 13, 2021 nü agia liasü.

Iba sentong nung Project Director DRDA, M. Toshimongla Kichu ajanga shilem agirtem pela agizüka liasü aser EAC, HQ Mokokchung, Vitolu-i sentong omen nung ajemdaker o jembia liasü.



Independence Day benjongmung nungtem nung August 12, 2021 nü Changtongya Town nung lokti nübudok sentong ka ayongzüka liasü. Iba sentong nung nüburtemi shilem tajung agia jila müreka ayutsü mechi ward ajak müreka liasü. Iba sentong nung sorkar mapa inyaker temia pei office temeket müreka liasü. Iba lokti nübudok sentong ya Rorheu Peseyie (NCS) SDO (C) Changtongya, GBs aser ward ketdangsur lenisüba kübok agia liasü.

*Remembering Our Dearest Father*  
**On his 1<sup>st</sup> Death Anniversary**  
**LT. TEKATEM JEN WALLING**  
28.12.1938 – 14.08.2020



*"Those we love don't go away, they walk beside us everyday, unseen, unheard, but always near, still love, still missed and forever dear."*

**We miss you & Love you always**  
**Loving Family Members.**

OFFICE OF THE  
**AO UNION TIZIT AREA**

P.O : P.S. Tizit, Dist - Mon, Nagaland - 798602

**AKÜM TSÜBUA TENÜNGSANG AGÜTSÜR**

Tizit Area nung aliba Aor Telongjem rongnungi SHRI TEMSÜTOSHI SANGLIR, Sub Divisional Agriculture Officer ( SDAO ) Agri Department Tizit Sub Division nungi Deputy Director menden tongtetba asoshi asen asen Tizit Area Aor Telongjem ajak tenüing nung Sanen Luden Menden ajanga nü nem tenüingsang tetushi agütsür.

Küm ishika külemi liyonga arudang nai asen yimden aser kija kibongtem asoshi mapa tajung aika inyaksüba atema kanga pelar.

Nü mapa tajung asoshi Tsüngremi moajangma.

Sd/-  
**Mr. Senti Tzüdir, President**  
Ao Union Tizit Area  
District : Mon, Nagaland  
Dated: 13/08/2021

Sd/-  
**Mr. Sashi Lkr, General Secretary**  
Ao Union Tizit Area  
District : Mon, Nagaland  
Dated: 13/08/2021

**EduVersity**  
NPSC PREPARATION 2.0

**GS FOUNDATION COURSE**

**NPSC UPSC**

ADMISSIONS OPEN - 10% OFF



PRELIMS & MAINS  
EXCLUSIVE  
PREPARATION

EXCLUSIVE  
VALUE ADDED  
MATERIALS

NPSC | UPSC  
PERSPECTIVE  
CURRENT AFFAIRS

PESTEL ESSAY  
& ANSWER  
WRITING

BOC | KOHIMA



+91-7005114715

## KPC ajanga asükhü lemsateper

**Dimapur, Luroi/August 13 (TYO):** Nagamese Khobor indang kibur aser taoba mapang Yimo Zülur inyaka alisang Lemei Phome asüba osang angashia sasa bilemer, ta Kohima Press Club ajanga sangdong ka nung ashi. Lemei Phome ya August

12, 2021 nü Dimapur nung asü. Mangyimer kibong den KPC ajanga asükhü lemsateper aser parnok temolung nung tesunep aser anisungzüik agüjang ta sarasademsür, ta KPC tongti sangdong ajanga ashi.

# Assam MLA Hostel campus nung Health Care Centre lapokogo



**Guwahati, August 13, 2021 (Agencies):** Assam chief minister Himanta Biswa Sarma-i Hokolbarnü MLA Hostel campus nung Bidhan Sabha Swastha Sewa Kendra (Assembly Health Care Centre) lapoktsüogo.

Assam chief minister Sarma-isa Assembly Speaker, Biswajit Daimary ket nungi health card agizük.

Assembly Health Care Centre ajanga pharmacy, laboratory, physiotherapy clinic amala facility ajak agütsütsü aser doctor, nurse o pharmacist tem teti alitsü.

Iba dakji alia hopta nung anogo 5 tashi Gauhati Medical College nungi specialist doctor

kati yariteptsü. Iba mozü kidang anepalutsü atema taoba aser tang teinyakdak MLA tem, parnok kibongtem aser Assembly Secretariat ktdangsurtem nem digital health cards agütsütsü.

"MLA temi nübertem tenzüksü atema teti anema alitsüla" ta tanü chief minister Sarma-i ashi.

"Iba mozü ki ajanga tesüiba aser tang teinyakdak MLA tem aser assembly secretariat ktdangsurtem dang masü saka parnok kibongtem nem healthcare services tajung agütsütsü" ta paisa ashi.

"Assam Legislative Assembly indang MLA Hostel campus nung yamai temelenshi

tajung bener aruba atema Assam Legislative Assembly Biswajit Daimary nem tenüngsang agütsür" ta Sarma-isa metetdaksü.

Sorkari iba atema senotsü peria lezmüktsüogo, ta paisa shisem.

Iba sentong nung Assam Assembly Speaker Biswajit Daimary-i tesentepertem pelaa agizük aser health minister Keshab Mahanta-ia o jembi.

Sentong nungsa Assam Assemly Deputy Speaker, Dr. Numal Momin, parliamentary affairs minister Pijush Hazarika, leader of the Opposition of ALA Debabrata Saikia aser minister o MLA tem aden.

**Piles Cure Centre** - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisüaka, tang **H. Umar Chesam contact no.8416087414 / 7627998690** Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM** - Yours sincerely - **Hokali P. Awomi Zunheboto**

# Shillong nung Manipur chuba'er kimung nung state Bhawan yanglutsü

**Shillong, August 13, 2021 (Agencies):** Meghalaya yimtiba Shillong nung aliba Manipur Rajbari ya taoba mapang Manipur chuba'er kibong indang ki liasü saka tang state Bhawan agi melentsü.

Iba osang ya Manipur chief minister Biren Singh-i Hokolbarnü metetdaksü.

September 1949 nung Shillong nung aliba Manipur Rajbari nung 'Manipur Merger Agreement to Dominion of India' nung sign sütepa liasü.

Manipur Merger Agreement to Dominion of India ya Manipur nungi Maharaja Bodhachandra aser India sorkar tsüngda sign asü.

"Otsüsütsü aketba Manipur Rajbari, Shillong ya Manipur

Maharaja indang liasü aser Manipur Merger Agreement to Dominion of India sign asü idaki Maharaja Bodhachandra anenzüka liasü. Tejashitsüka iba kimung ya Manipur chiba'er kibong indang masü kümogo" ta Manipur CM Biren Singh-i metetdaksü.

Shillong kübok Laitumkrah nung aliba kimung ya aiben jembitepa arur Manipur sorkar ket nung agütsüogo, ta CM Biren Singh-isa ashi.

"Redlands, Laitumkrah nung aliba ali acre 1.93 ji Manipur sorkar ket nung agütsüogo. Iba kimung nung Manipur Bhawan yanglutsü state sorkari lemtetogo. Meghalaya sorkari yaritepba atema pelar" ta paisa ashi.

# Assam nung KNLF züngsem ajak temai adokogo



**Guwahati, August 13, 2021 (Agencies):** Assam kübok Karbi Anglong district nung Kuki National Liberation Front (KNLF) nung anünga aliba züngsem ajak Hokolbarnü temai adokogo.

Tanü KNLF züngsem 27-i prangpong 17 bener DIG aser Superintendent of Police, Karbi Anglong tsüngdang temai adok. "PM Narendra Modi aser

Home Minister Amit Shah na lenisüba kübok Assam nung teti atema yimjung bener arutsü mapa inyaker" ta Chief Minister Himanta Biswa Sarma-i metetdaksü.

"UPRF/KNLF(KUKI) nung anünga aliba züngsem kar temai adokogo aser parnoki DIG aser SP, Karbi Anglong nem prangpong 17 agütsüogo" ta CM Sarma-isa ashi.

# Mizoram nung Rs 1 crore alang heroin apu

**Aizawl, August 13, 2021 (Agencies):** Mizoram kübok Champhai district nung Assam Rifles sepaitemi heroin gram 250 apu.

Iba ya Myanmar arrtsü

anasa Ruantlang yim nung apu, ta Assam Rifles sangdong ka nung ashi.

23 sector Assam Rifles indang Serchhip battalion aser Customs department

ketdangsurtem yaritepa heroin apu.

Parnoki apuba heroin indang jenjangji Rs 1 crore shi indang liasü aser Customs department ket nung agütsüogo.

# NÜ TANGATETBA MELENSHIANG

- Kümdanga liaka, nisung kari COVID-19 menara, ibaji parnok tai masü.
- Okrongba mapang, shiranger aser kibongi teyari aser amalitep nüngdaker.
- Covid-19 ya putetli anepalura taneptsü angur.

## ASENOKI TANGAR SENZÜKA AMSHIBA JAKLATEM:

-  O tamajung ashiba aser Timtem agütsüba.
-  Shiranger indang miim osang prokshiba.
-  Tai tongloksüba, Maaksüdaksüba & Magizükba.

## COVID-19 AZÜOKBANUNG TETSÜKDAKTSÜ AJURUBATEM

-  Shirangba yimya miimshiba, metendangba aser anepalutsü nungnangba.
-  Shirang nung jenbua alitsü atema teinyaktsütem meinyakba aser virus prokshiba.
-  Temolung animesüngzüktetba, tekolok anibelemba & tekolok nung timtem aliba tamajungba kümdaksüba.



**NAGALAND AGAINST COVID-19**

Dail State Help line No. 1800-345-0019/ National Toll Free - 1075 For any queries on COVID-19 and other health issues.

FOLLOW US

-  @DHPWNagaland
-  dohfw\_nagaland
-  dohfw\_nagaland
-  @HealthNagaland

ALWAYS FOLLOW PRECAUTIONARY MEASURES



\* Kümzüka alitsü atema COVID-19 indang dose ajak agiang. \*



# TIR YIMYIM

## YIMOBILEM (EDITORIAL)

DIMAPUR KÜPTOKNÜ LUROI(AUGUST) 14, 2021

### Tanü menoknok tulu anak nungbo!

**T**ang ya asenok tia mejungika Nagaland nung menoknok tuluka anoka yimitem nung ki tulu talang aika chirepa laoa lendong tulu atalok, nisung aika asü aser aika yirur lir saka ki tulu chirepba agi nembanga alinungji tasürtema magitetetter aser taküm alirtema mekümzüktetter, gari lenmanga ajak nembang, electric yindong ajak lao nungji yinzü ajak tokdanga raksa, anungji light marur ta asüba tensa nung nisungtem jepteper, asateper aser yimti ajaklen rongronger ta ka atalok nunga, iba lendong mapang yariteptsüsa Nagaland Disaster Management renema lir asü mesüra idangjia arogo aser lokti tentettem dang yariang ta ashitsü (?) ta tawa Comptroller Auditor General of India (CAG) osang ngur kanga shisabolua bilemer. Tsüngrem taochi agi kümzüka ayur dang ashi, shitakba nunga Nagaland ya linük nung menoknok kanga sashia anoktsüba tesemtem rongnung ka lir. Anungji, menoknok tuluji manokia anoktsü amai bilema anogo shia nisunga aser oseta shitak renema ayutsüba Nagaland nung alirtem asoshi nungdaker. Kodang asenoki alima lendong rongnung menoknok aser tzümetsüng lendongtem indang bilemdangdir, item lendongtem yabo tang asenoki ajuruba Covid wara lendong dang nungi ajungbenba, tesashiba aser tuluba ataloktsü. Iba wara agi India tongli, linük tesem balala nungi asen nübortem meyipa aruba mapang to kodang bilemdangdir, arogo aser lokti tentettemi meyaritep asübo government ket nungbo senotsüa mali, nüboa mali, garia mali aser mozü kidang yiptena peria maka ta asenok ket nung akababo kecha mali asü. Ibayongji, kaketshirtemi dena yaritepa bus gari anepalua nübortem pei alidak tongtsü, arogo aser lokti tentettemi pei pei alidak quarantine center lapoka anepaluba agi mezüng Covid tongpang kokogo ta bilemer. Iba sülen tang tashi arogo, lokti aser kija kibong aikati government mozü kitem nung nungdaktatem repringteta tenlaba angur. Aji oda, government-i government mozü kidang shiranga amongertem nem chiyongtsü aser mozüa junga magütsütetba tia nung asenokbo temulung lemlema lidagi. Asenok ya tanur-ang mesük, kechiyong tanuribo tajung tamajung memetet, anungji chiyongtsüa makayonga shisamebulur aser alima lendong ataloktsü asüyonga kecha shishia mebilemer. Kasükabo, tanur amaji makamait aser lendong timtem aliyonga shisamebulu alibajia junger, saka tanurtemji tarutsü nung junga lia aotsü atema karibo kanga shisabolua bilema, peiang machi aser magi arema inyaksü tim. Iba tangatetba tanülaji asenok yimten, arogo aser lokti nung inyaker taintem dak alitsü tim. Ajisüaka, kecha khuret maben, shisabolua mebilemi alitsü aser kodang tanü ama ajungben lendong timtem atalokdir, mezüngyongi tangar dang teyari meshitsüsa alitsüba nübortem asoshi dang masü lenirtem asoshia lendong asütsü. Parbo yimsüsür tularji mesüra parbo takarji alima lendong majurutsü ta mali, ashiko ki tuluba aser talangba nung alirtemang lendong tuluba ajurutsüa akok. Item ajakji asadanga, joko, asenoka asen akatsü dang memerangi alima lendong nungi asena kümzüksüsa yimti nung kisüjensüba nungi tenzüker, alima lendong atalokba mapang amshitsü nungdaktatem nübo aser oset ajak shitak renema ayutsü tim. Menoknok aser tzümetsüng lendong tulu ataloka yur, State Disaster Management purtemang arogoi, loktii aser kija kibongi yaritsüsa kümra, menoknok lendong dangbo ajiang shisabolutsü tuluba asütsü. Shitakba agi asen lima ama menoknok sashia anoktsüba tesem nung alirtem dangbo mapang mapang shia menoknok lendong nungi peisasa kümzüksü asoshi tasa aser lenmang radio, tv aser osangkakettem ajanga sayutsü tim. Talisa kaketrejutem nung tanurtemi item alima lendong nungi jenbutsuba tasatemji meteta alitsüla. Kisüjensüba maparen nunga, joko, pei yanglunütsü meyangludaktsü alima lendong mapang lendong madak lendong mataloktsüsa ozüng amshia yangludaktsüsa tim. Item ajakji asadanga kiojen meyanglura asen ki laoba agi asenjibo yutsür kidanger aser kiyonger kitem dena laodaktsüsa lendong ataloktsü. Alima nung alir asünungji, kenü mesüra kenübo asen lima nung lendong tulu ataloktsü, anungji Disaster Management mapa nungsa temulung tagütsüba aser ochitashiba inyaksüla. Ajisüaka, Nagaland nungbo Nagaland State Disaster Management Authority nung dena senotsü amshibaren nung cash book mamshi, stock registerbo mayu, Measuring Books-bo temeteta memetet aser review meeting-a malir ta CAG-i osang nung metetdaktsubaji taoksatsüka lir. Ibaji kodang bilemdangdir, tang ya menoknok aser tzümetsüng lendong atalok nungbo, alima lendong agi asübatem dang nungibo State Disaster Management purtem renema maliba agi teimba nisung taküm samatsü.

# OLEMSABANG

## Laptop aser Laishiba

I. Imdang Ozüküm Er. Retd.

- (1) Kü tangatetba kaolemsapang ajanga lemsatepner. Laishiba dang Tsüngrem o ta asenoki meteta lir, aser asenoki Tsüngrem o jembidang laishiba lapoker jembir, Talisa Tsüngrem memetet dang laishiba melapoki jembira parnoki mangar aser laishibaji tongtipang masü amai shibai laishiba teka nung mami aser laishiba tekongtem mamshi sayutsüngidir Tsüngrem o masü ama mesüi angur.
- (2) Anungji laishiba meteni sayutsüngibaji tereprangtsü majungbaji dang masü, saka Tsüngrem o nung aibelentsü akok. Laishiba chapter aser tekong ji temulung agi meteta alitsü tim ta nibo pilemer, Tsüngrem o mongyintyemi laishiba tokong shidak shia laishiba lapoka yur jangratema jembir aser tanüla amshiba asenoki meteter. Yamaji,
- (3) Tsüngrem o jembidi dang Tanüla temeshi agi na ajanga jembir asü masü? Mesüra na nü shi tejangraba agi jembir asü masü aji mena alir ajaki angatetaker, anungji nai aser ni Tsüngrem o jembidang kanga bendanga aguja sarasadema lesson bushirang pulpit nung nokdaksü merangtsüla, Tsüngrem tanüla na amshiba naia metetsü aser dangarei pa den Tsüngrem tanüla dena o jembidago ta nuburtemi jembir aser temoatsü angur.
- (4) Tsüngrem o jembir sünung pulpit nung laishiba azüngdang zünga motet tetezüa memetet züngshia kazüba jagi sentep kidang mena alir ajakjagi nu noksa tetenzük nungi tatempang tashi meteta toker. Aser asen aor balaka Tsüngrem o ajak metetjemer sentep kidang mena lir, aser item dang ashitsüba aseni lai mepushi-i sayutsüngira nu sayutsüngibaji tamasa ka dang ta angatetsüla, kechiyong Tashi mangar dangashi Tsüngrem o ajak züngmar, metetjemer mena aliba telok rongnung na nokdaker sayutsüngir ta metetsüla. Oshilu sayutsüngi masütsü junger, Hau nai Tsüngrem o jembir ta nai metet aser telokia metet. Anungji nai mamangi jembir ama jembia oli aser lai o jagi ashir ta, Tsüngrem o nung ji shia lir ta, na second person masütsüla. Tsüngrem o nung shia aliba nai jembir, surapangla na first person sür jembitsüla, tatishitsü agi (temenen purtemji mulumi-i aotsü ta laishibai ashir) ta masü, temenenpurtemji mulumi-i aotsü ta dang sayutsüngitsüla. Nai taoya ta Tsüngrem o-i ashir ta masü, direct dang sayutsüngitsüla.
- (5) Temulung agi laishiba tokong nai ashi saka tai ashi dangji shidakba tokong meteta alisang jagibo na menutsütsü akok aser dangar metsüdaktsütsü, mapang ka nung sentep ki ka nung Reverend kati kü dang ni o jembizüker sentep senshidang meranga lesson bushir junga jembidago ta ku dang ashi, ni langzü naia lesson bushir jembiangma ta ashinung pai tejak meküma sayu.
- (6) LAPTOP nungi Topic zülur aji zünga sayutsüngiba yimyaji ku tsüngdangbo majinutiba yimya ta ku tangatetba nung ashir, aser kodang LAPTOP nung sayutsüngiba TV nung mesura you Tube nung ngudir nibo majir. Na LAPTOP nung zülur memory azüngba mapang nungji na ajanga Tanüla temeshi-i na semdanga dangar temoatsü ngudagma? Nai LAPTOP nung zülur azüngdang junga majiteti azüngdang tanüla temeshi-i na semdangdarma? tanüla na amshiba nai meteterma? Nü tanüla tenük temulungjangji Kibuba dak rangloker nai LAPTOP ji zünga na aser dangar temoatsü shidak ngudaktsüdarma?
- (7) Nai Laishiba nubur dang sayur asü? LAPTOP-i na sayur? Küm 20,30, 40, tema Tsüngrem o zünger laishiba tapu tekong kong kechi shia lir memetetba tenzüker LAPTOP nung züluzüker aji lepshia züngaluli ano tenzüker tenzüker zünga aluli ta sayutsüngiba nungji nütsüngtem temoatsü mangur. Nai kechi onük jembitsü aser kong atemtsü aji nuburtemi na o tenzükdang meteta toker mena ataa aliba pur tem den na o jembitsüji lesson mebushi-i LAPTOP zülur zünga menokdak tajungba.
- 8 LAPTOP ji Laishiba masü, Lesson bushitsü LAPTOP-ji amshitsüakok saka pulpit nung laishiba mamshi-i LAPTOP dangamshibaji Tsüngrem o koba taküm o taküm kakut ( BOOK OF LIFE) lir iba ya asenoki mezüngmeshir regard masür. LAPTOP-ji ang Pulpit nungji tuluba kümduksür. LAPTOP nung sayutsüngir nai aser ni item o ji asen temulungjang nung rezünga ayur asü masü? Itemji LAPTOP nungji dang zülua ayurashi nai aji memetet ta süra nai Tsüngrem oji nü dak monga mali, süra nai kechi sayutsüngi aji nai memetet den kesa dang.
- 9 LAPTOP nungji Tsüngrem o masüba tamagitsü ajak lir, Tsüngrem anemer otsü aika lir, alima jabujari aika lir teyazü ainkar otsü aika lir, alima indang zünger mezüngma aika lir shi azü jangraba temenen mapa ajak lir, shibai kechi bushir ajak iba LAPTOP nungji lir. tesuiba otsü tiazüa aika lir shidakba otsüa lir. Tsüngrem o masüba otsü zünger mezüngma aika lir, anungji dang ibai laishiba ama mamshitsüla ta angateter.laishiba melena LAPTOP mamshitsüla.
- 10 Alima indang ajak idaki lir Lishiba nung Tsüngrem indang dang lir saka alima indang shia mali ( alima tetezü temenen indang dang ajar) Tsüngrem o bushitsü LAPTOP nung lir aser aji tepushi ta mashir saka pulpit nung LAPTOP-ji Laishiba tekümdaktsü dangar temoatsü mangur ta shinur,
- 11 Doctored pastor ka dang ni yamai ashi LAPTOP nung topics renemer Tsüngrem o jembiba yabo Laishiba sa süaka Laishiba melapoki LAPTOP dang lapoker jembibaji majunga kechiyong Laishiba lapoker jembibaji sa kanga tajungba aser nüburtemia Laishiba lapoker jembidagang temoatsü angur aser puluit nung Laishipajisa tajungba ta ni ashi nung iba Doctor pastor ba jagi onok non Christian lima nung teti mobile aser LAPTOP nung dang sayutsüngia senzür ta ashi, aser kü dang yamaji asünungbo ni ku arogo nung projector tashi ya agizükatoktsü, aser electronics osettem ya agizüka toktsü ta langzü. Saka pa kümka küm foreign tashi degree aika zünger iba tangatetba Doctored kati Laishibaji tesülen yutsür LAPTOP ang pulpit nung Laishiba melen Kibur kümduksüba ama, tangateteremibo shidakbaji angateta amshinungbo kanga ajungtsü. Pei pei tangatetba nung tangatetba tajung agi angateta amshitsü merangti aser shibai tajung nung angateta amshir pa temoatsü asütsü.

(Nisung tsüngdang shidak mesükba lemang ka lir, saka iba tatempangji tasüba lemang. A.Shin 16:25.)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Florida nung aliba Arogo kati vaccination camp ayongzüka agi



August 08, 2021 nü Jacksonville, Florida nung aliba Impact Arogo nung coronavirus vaccination camp agidang tangokba noksa nung angur. Iba camp nung nisung 250 shi nem COVID-19 vaccine tutsüogo. Taküm March ita nunga Arogoi ayongzüka nisung 800 shi nem vaccine tuja liasü.

**August 13, 2021:** Florida nung aliba Arogo ka nung anogo ter tsüngda züngsem trok tashi coronavirus tashidak agi asüba sülen Arogoi vaccination camp ka ayongzüka nisung 250 shi nem coronavirus vaccine tutsüogo.

Florida kübok Jacksonville nung aliba Impact Arogoi taküm March ita nung vaccination camp ayongzüka nisung 800 shi nem coronavirus vaccine tuja liasü. Arogoi taoba Amongnüa-a (August 8) coronavirus vaccination camp ayongzüka katsüogo.

Osangbener den jembidang Impact Arogo nung Pastor, George Davis-i, taküm March ita tashi nung Arogo nung züngsem ka danga coronavirus tashidak agi masü, aser iba mapang nungjia vaccination camp ka ayongzüka agia liasü, ta metetdaksü.

Amongnü nisung 269 nem coronavirus vaccine tutsü aser parnok rongnung tainlonglongpur aika liasü, ta paisa metetdaksü.

Davis-i, tawa Arogo züngsem trok coronavirus tashidak agi asüba agi vaccination camp tanaben ayongzüka agir masü, ta ashi.

Pastor-i, "Onoki nüburtedang vaccine agitsü ajungshia arudar. Vaccine agitsü atema nisung aika nem maongka agütsüsü nüngdaker, kechiyong onok Arogo nung ano vaccine magir aika lir. Iba yongji iba camp tanaben ayongzüka agiogo," ta metetdaksü.

Impact Arogoisa iba wara anema raratsü atema Mongolbarnü senden ka ayongzüka menogo.

Nüburtedang vaccine agidaksüba nung Arogo teinyak shilem tongtibang asü?, ta asüngdangba langzüdang Davis-i, iba ya tasüngdangba kanga tasak ka lir, kechiyong Arogo karibo vaccine khenyongi magitsüla ta ajungshir, ta metetdaksü.

"Onok ya tamang sayuba Arogo ka lir. Onok ya tamang jenjang nung amangba Arogo ka aser onoki Tsüngremer

taneptsüba nung amanger, ajisüaka tamang aser medical science napronglaji tongtibang," ta pastor-isa metetdaksü.

"Temang nung taneptsü mozü bushiba tsütsü Tsüngremer doctor aser scientist tem nem shisatsü agütsür. Kodang taneptsü mozü ngudir, aser ibaji ajanga temang nung timtem madoktsü ta kuli ngudir, asenoki iba maongkaji agitsüla, ta nibo bilemer," ta pai ashi.

Ajisüaka lenirtemi pei tangatetba nung inyaksüji tongtibang, ta pai ashi.

"Onokibo vaccine ya Tsüngrem nungi sempet ka lir ta amanger," ta paisa shisem.

Iba Arogo nung coronavirus agi shiranga asür nisung trok nungi pezübo arrshi küm 35 tekübokpurtem lir, aser iba tashidak memenadang parnok temang kanga junga dang liasü.

Iba dak alia tang iba Arogo nung züngsem 15-20 shi coronavirus agi shiranga hospital nung mongdar aser nisung 10 shi kidang mongdar.

## ANO GO ABEN TSÜNGREM DEN

### Kodang Tsüngremi jembidir, yamaji alir

*Yamaji kü bang nungi aoba kü o alitsü: aji amajok nung kü dangi meyipa marutsü, saka aji agi ni aginüba ataloktsütsü aser ni koba asoshi yok iba nung azükarutsü. Isaia 55:11.*

Kodang Tsüngremi jembidir, kecha mataloki malir, memelenshir malir. Tetenzük mapang nungi, Tsüngremi jembiba aser kecha makaba nungi alima yanglu. Tsüngremi alima yangludang Pai timi tarensena ka nung (pattern) yanglu: Pai jembi, yamaji liasü, ibaji junga liasü (Lipok 1:3-4). Ibai tarensena Laishiba ajunga jungkai adoktsü; Pai ashiba ama mapa ajak atalok aser Tsüngremi aji junga angu (Fil. 2:13). Tsüngremi tebilemba meshidang Pai jembiba mapa akümstsü ta temulungtetba Pai jembi.

Kodangsa Yisui jembi Pai jembiba ama atalok. Chitemra akettertem Yisu nungi O ka jembibaji taneptsü ta angu (Luke 5:13; 17:14). Nükpokeri Yisu nungi o ka jembibaji angutsü tenük ta angu (Luke 18:42). Yisu nungi atakatem o kaji teraksa ta nütsüngtemi mongu zü nu dong nungi angazük (Mark 11:20). Yisu o nungi temenen puri tatok angur (Yn. 8:11). Lazar shia arudaktsütsü asoshi Yisui kwiben merang? Ken dang (Yn. 11:43). Yisui jembiba o kecha matalok mali.

Yisui ne den jembidang kechi ataloker? Yisui jembiba otem Laishiba nungi azüngdang ne taküm nung temelenshiba kecha makai azünger asü? Yisui Farisitem aitsü kechiaser zülua alibaji metetba ajanga parnok nem taküm agütsütsü ta parnoki amang. Shibai oji jembi paji akatsü melen parnoki o akaba nung temulung süa liasü (Yn. 5:39). Tsüngrem nungi o kaji ne taküm nung koda tashi tait lir! Nai Laishiba azüngdang aser sarasadem dang, Tsüngremi ne taküm asoshi kechi mulung angang.

## Indonesia nung küm 30 sülen ang Tenla ki asütsü Arogo dang melaogo



St. Bernadette Arogo tenzüker küm 30 jungogo, saka tang ang mezüng Tenla ki asütsü atema tesem meshitetba sentong nung tangokba noksa nung angur.

**August 13, 2021:** Indonesia nung küm 30 sülen ang Tenla ki tasen ka asütsü atema Arogo dang melaba ajanga Jakarta Arogo kanga pelar.

Banten province kübok Tangerang City nung ketdangsertemi Tenla ki asütsü atema St. Bernadette Arogo nem temelaba agütsü.

Permit agütsüba sentong nungji sorkar ketdangsertem, Jakarta nung tongti putir, Ignatius Suharyo, Interfaith Communication Forum nungi

züngsemtem aser lisopur Muslim nungera aika aden.

Tenla ki tasen asütsü atema temelaba agütsüba sülen Sang Timur Sisters-i ketdangsuba Sang Timur School moapu nung Tenla ki tasen asütsü atema sentong ka agiogo.

Jakarta nung Jesuit tongti putir, Leo Sukoto-i 1990 küm iba Arogoi tenzüka liasü, aser iba Arogo nung züngsem 10,000 dak tema liaka Tenla ki asütsü atema küm aika temelaba magütsü aruogo.

Osang angazükba agi, Muslim nunger telok balalai ashishiba agi ketdangsertemi Tenla ki asütsü atema Arogo nem temelaba magütsü aruogo.

"Tenla ki asütsü atema temelaba anguba asoshi onoki sorkar ketdangsertem densema teyariteper ajak dang pelar," ta Suharyo-i metetdaksü.

1990 küm Tenla ki asütsü atema temelaba magütsüba sülen Arogoi Sang Timur School nung ang tekülem setong agia aru. Ibiaja ashishia Muslim yimsü alia amangertemi 2004 küm khen aser 2013 küm khen iba school shibangja liasü.

School shibangtsüba mapang nung Arogoi tesem balala nung tekülem sentong agia aru aser ketdangsertem dang aiben Tenla ki asütsü atema mepishia aruogo.

Jakarta Archdiocese indang ecumenical & interreligious affairs commission chairman, Antonius Suyadi-i, iba ya tang tashi mangatettep onük ka lir, kechiyong nisung karibo Tenla ki asütsü melaba anema nokdaker, ta metetdaksü.

## Plateau State nung kiralongrartemi Christian Orphanage ka amak

**August 13, 2021:** Plateau State, Nigeria nung Jihadist Fulani teloki Khristantemi lapokba orphanage home ka amak, ta International Christian Concern osang ajanga metetdaksü.

Khristan Orphanage home nungji lajar 147 telidak liasü, ajisüaka Jihadist teloki amaktsü lia parnok ajak tangaleni anir jena ao.

Osangbener den jembidang kiyong nung alir kati, "Aonung 7:00 ako meta amangtsü lia parnok aru. Fulani telokji Nigerian army-i yarisema liasü. Army van asem nung army temi parnok meina aru. Sepaitem jagi onok meyar aser parnoki ki aika rongdoktsü," ta metetdaksü.

"Iba orphanage nungji tang shinga mali aser tanurtemji tesem balala nung prokshia lir," ta Religious Freedom Coalition-i metetdaksü.

Ano tanga tatalokba ka nung Fulani teloki Miago aser Jos area nung ki 500 aser Tenla ki 5 raksatsüba den külemi

Khristan 68 tepsetogo. Nigeria nung prangpong amshitsü ozüngi memelar, ajisüaka Fulani telok ket nungbo sepaitem den kasa prangpong lir.

Africa nung linük tulutibaji Nigeria lir aser iba linük nung nütsüng million 200 shi lir. Iba linük nung Khristan nütsüng timba lir aser kobi melii alima nung Khristan nütsüng timba aliba linükji Nigeria akümstsü.

Akhidang nungi iba linük nung rara aliba, yimli balala aliba aser colonialism aliba ajanga iba linük nung Khristantem alitsü majunger. Rara ajanga küm shia Nigeria nung Khristan meyirjang aika tepseter aser aika jenshir.

Nigeria nung tongti yimsü anaji Islam aser Khristan lir aser yimsü ana amanger nütsüng shilem 90 shi lir aser tanüngba nütsüngji sobaliba yimsü amangertem lir.

Yaküm December 7 nü U.S. State Department-i Nigeria ya Countries of Particular Concern (CPC) linüktem rongnung züngokogo.

**OLONG PAITEP # 5905**

|    |    |  |    |  |   |    |    |    |    |
|----|----|--|----|--|---|----|----|----|----|
| 1  |    |  | 2  |  |   | 3  |    |    | 4  |
|    |    |  |    |  |   |    |    |    |    |
|    |    |  | 5  |  | 6 |    | 7  |    |    |
| 8  |    |  |    |  |   |    |    |    |    |
|    |    |  | 9  |  |   |    |    |    |    |
|    | 10 |  |    |  |   |    |    |    |    |
|    |    |  |    |  |   |    |    |    |    |
|    |    |  |    |  |   |    |    | 11 | 12 |
|    |    |  | 13 |  |   |    | 14 |    |    |
|    |    |  |    |  |   |    |    |    |    |
| 15 |    |  |    |  |   | 16 |    |    |    |

- |  |       |                             |       |
|--|-------|-----------------------------|-------|
| <b>TIPIEN</b>                                |       | <b>LANGTSÜNGLEN</b>         |       |
| 1. Anenzükdak ki                             | - (5) | 1. Reprangdaktsü            | - (4) |
| 3. Asür mangyimba                            | - (5) | 2. ___ ur                   | - (3) |
| 5. Temulung nung shisadang                   | - (5) | 4. Kiojen yangludak         | - (6) |
| 8. T ___ lu                                  | - (3) | 6. _____ ait                | - (7) |
| 10. Takdang temalen                          | - (9) | 7. Nagaland nung ayong ka   | - (5) |
| 11. Tesa ___ a                               | - (3) | 9. Küm kasa purtem          | - (5) |
| 13. Ajungbena temulungjang tongtonglatsü atu | - (5) | 10. Tetsüng tajemetdak      | - (6) |
| 15. Tejen lai nung tesayur                   | - (5) | 12. ___ adenshi             | - (4) |
| 16. Tsüngsak-mopung                          | - (5) | 14. Tsünüsenbongtsü adokdak | - (3) |

**OLONG PAITEP # 5904 TELANGZÜBA**

- |   |  |
|---|--|
| <b>TIPIEN :</b>                         | <b>LANGTSÜNGLEN :</b>                  |
| 1. Kasa, 6. Rangben, 7. Mait,           | 1. Khu, 2. Süjak, 3. Onük, 4. Oba,     |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita,     |
| 17. Rajang, 20. Lanu, 24. Nüngjem,      | 10. Tar, 12. Tinu, 14. Salem, 15. Aja, |
| 25. Süra.                               | 18. Anünü, 19. Taju, 21. Ano, 22. Onü, |
|   | 23. Kua.                               |

**Noksa nung meputepi aliba 9 bushiang**



**TANÜBO NAI LANGZÜANG**

Q. \_\_\_\_\_ saisapong atema Olympic gold medal angur tanubusang rongnung Bob Mathias aküm.  
 A. Sailing      B. Field Hockey      C. Table Tennis      D. Decathlon  
 \_\_\_\_\_ (Taruba adok nung onoki langzütsü)  
**YASHI ADOK TELANGZÜBA : 1942**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Koma**  
 (adv) Kechi koda lir ?(how ?)  
 \* Mokokchung tensa koma lir ?

**Komala**  
 (adv) Kechi mesük ? ( like what ?)  
 \* Na komala tesem ka nung linür ?

**Tir Yimyim**

**NAI-A YA METETTER MA?**

MCU (Marvel Cinematic Universe) nung ajaki sapuba actor rongnung Robert Downey Jr (Iron Man) asütsü. 2008 küm Robert-i MCU indang Iron Man nungi tenzüka iba film series aser franchise indang Avengers film balala nung shilem agiba nguogo. Item film nung pai külem 'Avengers' cast dang nungi sen timba aazüka liasü. Marvel film nung, Robert-i dollar million 20 nungi tenzüka Avengers: Infinity War nung pai dollar million 75 tashi aazükogo. 2017 küm sayaba 'Spider-Man Homecoming' film nung Robert-i shilem tilaka agia lir aser anogo asem shi iba project nung inyakba atema pa nem dollar million 15 taa agüja liasü.

**SUDOKU # 5945      TELANGZÜBA # 5944**

|   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|
|   |   | 3 | 8 |   | 1 | 7 | 5 | 2 | 1 | 4 | 8 | 6 | 9 | 3 |
|   | 1 |   | 5 |   | 3 |   | 7 |   | 8 | 6 | 3 | 9 | 7 | 2 |
| 6 |   |   |   |   |   |   |   |   | 9 | 1 | 4 | 3 | 6 | 5 |
|   | 5 | 9 |   |   | 6 | 8 |   |   | 6 | 2 | 7 | 5 | 9 | 4 |
| 8 |   | 4 |   |   |   | 7 | 9 |   | 5 | 4 | 8 | 2 | 3 | 1 |
|   |   |   | 1 | 9 |   |   | 3 | 5 |   | 1 | 3 | 9 | 7 | 8 |
|   |   |   |   |   |   |   |   | 4 | 2 | 7 | 1 | 6 | 5 | 3 |
| 9 |   |   | 2 |   | 5 |   | 7 |   | 3 | 8 | 5 | 4 | 2 | 9 |
|   | 7 |   |   | 6 |   | 9 |   |   | 4 | 9 | 6 | 8 | 1 | 7 |

**OJANG LUTEP # 5490**

- ERTSMÜNGRE :
- SNTOENG :
- MNGJEJAAI :
- AENS :
- MUUNGALK :
- NNGU :
- DJJAAANG :
- AESMTA :
- TAI :
- JAUURR :

**OJANG LUTEP TELANGZÜBA # 5489**

**TSÜRABUR MAONGKA NUNG DANG ALITSÜ  
 BILEMRA TAKÜM JENJANG YANGLUTSÜ TASAK**

**TAN HOPTA ATEMA - KOMA SÜLA ?**

Q. ABAM kübok arogotem nung sannükertem ya ABAM-i dang shimer mapang mapang shia, government mapa inyakertem amato, mapang apir arogo balalai transfer and posting yoka tenzükdaktsü nunga koma süla ?



August 13, 2021 nü Bhopal nung aliba Motilal Nehru Police Stadium nung Madhya Pradesh Police-i Independence Day benjungmong atema renemshiba noksa nung angur.

### I-Day nü aluyimertemi linük tesem ajaklen longkak aittsü

**New Delhi, Luroi/August 13 (Agencies):** India nung puti otsü nung tang mezüng Independence Day- August 15 nü aluyimertemi aluyimba oziüng tasen asem agienang, ta takhangba agüja linük tesem ajaklen longkak aittsü.

India nung 75buba Independence Day nü aluyimertemi 'Kisan Mazdoor Azaadi Sangram Diwas' amongtsü, ta aluyimer lenirtemi metetdaksü.

Samyukt Kisan Morcha-i ayongzüka aluyimertemi block aser tehsil level nung "tiranga rallies" agitsü, ajisüaka aluyimertem Delhi telungibo maitsü.

AIKSCC (All India Kisan Sangharsh Coordination

Committee) lenir, Kavitha Kuruganti-i, "August 15 nü Samyukt Kisan Morcha-i züngsem ajak dang Kisan Mazdoor Azaadi Sangram Diwas anogomong amongtsü aser longkak aita jajatsü tuyuogo," ta metetdaksü.

"Iba anogo nungji aluyimertemi tractors, motorcycles, cycles aser nashi atsüba talongtsütem nung longkak aittsü aser block, tehsil, district headquarters mesüra anasatiba kisan morchas mesüra dharnas tashi longkak aita aotsü. Longkak aitba mapang garitem nung linük wako asongtsü," ta paisa metetdaksü.

Aluyimertemi anüngdang 11:00 ako nungi nikongdang 1:00

ako tashi rally agitsü, ta aluyimertem lenir, Abhimanyu Kohar-i metetdaksü.

Delhi arrtsülen- Singhu, Tikri aser Ghazipur nunga linük wako bener longkak aittsü aser anogo piyong sentong balala agitsü.

"Onoki linük tesem ajaklen longkak aita jajatsü, ajisüaka onoki tesünep nung longkak aittsü. Onok Delhi telungi aitsü tebilemba mali, ta onoki aiben metetdakja aruogo," ta Kohar-i ashi.

"Taküm January 26 nü (Republic Day) tatalokba ajanga onok tenüng menükogo, anungji August 15 nübo onoki yimitem telungi maitsü. Onoki akhangba mataloktsü tashi onoki longkak aittsü," ta Singh-isa metetdaksü.

### India nung ano Covid agi nisung 585 asü

**New Delhi, August 13 (Agencies):** India nung ano nisung 40,120 dak coronavirus putet aser iba tashidak agi shiranger 585 süogo, ta Hokolbarnü Union Health Ministry-i metetdaksü.

India nung nisung ajak senteper 3,21,17,826 dak coronavirus putetogo aser iba tashidak agi asür ajak senteper 4,30,254 jungogo.

Tang India nung coronavirus agi teshirangdakpur 3,85,227 lir aser ibaji coronavirus caseload nungi shilem 1.20 dang lir.

Linük nung iba tashidak agi shiranger shilem 97.46 (nisung 3,13,02,345) anepogo aser iba nungji tesüiba ghonda 24

tsünga shiranger 42,295 anepba densema lir, ta Health Ministry-isa metetdaksü.

Tang linük nung hopta shia coronavirus positive putetba shilem 2.13 aser anogo shia positive putetba shilem 2.04 dang kümogo.

Brihostibar tashi nung samples 48,94,70,779 tendangogo aser iba nungji yashi samples 19,70,495 tendangba densema lir, ta Indian Council of Medical Research-i metetdaksü.

Tesüiba ghonda 24 tsünga coronavirus vaccine dose shiranger shilem 57,31,574 agütsüogo aser tang tashi nung dose ajak senteperbo 52,95,82,956 agütsüogo.

### Kolkata nung US Consul General melenogo



**Kolkata, August 13 (TYO):** Kolkata Consular district nung United States of America (USA) Consul General asütsü atema Wt.Melinda Pavek yoka lir aser lai yashi August 12 nü Wt.Patti Hoffman meleno mapa agizükogo.

US Consular General mapa ya pa mesüra la nem reprangtsü lemzüksüba tesem nung US aser India na tesendaktep tajungba küma aotsü asoshi inyaktsü. Kokkata Consular district kübok West Bengal, Bihar, Jharkhand, Sikkim aser Northeast nung aliba state tenet prongla lir.

"Yangi India anüdoklen US

tenüng nung arua alitsüsa kü nem maongka agütsüba ya akhüm tulu lir. Iba tesem nung alir nübortem ajurua aotsübaji ni' jangrar aser US o India na tesendaktep tajungba küma aotsü atema yangi Kolkata nung US Consulate mapa maneni inyaka aotsübaji jangratema bilemer," ta Consul General Pavek-i la yangi mapa tenzüka mapang metetdaksü.

La ya tamalen Tokyo, Pakistan, Brunei, Kathmandu, Jamaica aser Iraq nung US yimten tenüng nung yimten mapa tapu balala inyaka aruba tashitemetter aser yimten nung mongin lenir ka lir.

### Himachal Pradesh nung lendong balala nung nisung 248 süogo

**New Delhi, August 13 (Agencies):** Himachal Pradesh state assembly nung Chief Minister, Jai Ram Thakur-i, taküm June 13 nungi tenzüka tang tashi nung state nung lendong balala nung nisung 248 süogo, ta metetdaksü.

Bodhbarnüa anentsüh lendong nung nisung 14 asü aser nisung 16 samar tang tebushidak, ta chief minister-isa metetdaksü.

"Tenemlen anentsüh lendong kanga bulua atalokba ajanga nisung aika asür aser teraksatsüba tulu ataloker. Tenemlen geological survey agishitsüla, koba ajanga anentsüh alutsüsa aliba nungji ajemdaker mera shidak agia inyaktsü," ta pai ashi.

Chief Minister-isa, item lendong nung asür kibong shia nem sen lakh pezüzü agütsütsü aser kanga mejungi yirua alir shia nem sen 50,000 agütsütsü, ta sangdong.

Iba dak alia state transport bus lendong nung asür kibong

shia nem transport department-i sen lakh kaka agütsütsü aser yirua alirtem nem angati treatment agütsütsü, ta paisa metetdaksü.

Bodhbar nikongdang Himachal Pradesh kübok Kinnaur nung anentsüh lendong nung nisung 14 asü aser gari aika anebanga liasü.

Tenemlen nungi anentsüh aluba ajanga state transport bus ka, truck ka aser gari tila kar anebanga liasü aser Reckong Peo-Shimla highway mokdang. Bus nungji nisung 40 mener Shimla-i aoba mapang nung iba lendong atalok.

Iba lendong atalokba sülen Indo-Tibetan Border Police (ITBP) 200 shi iba tesem jagi oa kümzüka maparen tenzüka liasü.

Iba lendong atalokba sülen osangbenertem den jembidang Chief Minister Jai Ram Thakur-i,

"Ni police aser local administration dang kümzüka maparen inyaktsü atema tuyuogo. Anentsüh agi bus ka den gari ka anebangogo ta


osang angazükogo. Onoki osang tejangja atadar," ta metetdakja liasü.

Ato kilonser, Narendra Modi aser Union Home Minister, Amit Shah natia phone ajanga Chief Minister den iba osang metepela aser akokba tashi yaritsü, ta nangzükogo.



August 13, 2021 nü Prayagraj (Uttar Pradesh) nung National Disaster Response Force team-i tzümetsüng agi kongshiba nüburtem nem chiyungtsü lema agütsüba noksa nung angur.

## Taliban-i Afghanistan commander Ismail Khan puogo



**Kabul, Luroi/August 13 (Agencies):** Taliban-i Herat yimti nung Ismail Khan puogo, shiba Afghan sorkar tenung nung rara liasü.

Khan, shiba Afghan sorkar atema raraba sepai tanishir rongnung tematiba jenjang nung liasü, pa ya Taliban den tezüngzüktep yangluba nung shilem ka ama provincial governor aser security ketdangsür den külemi agütsü, ta provincial council member Ghulam Habib Hashimi-i Hokulbarnü ashi.

Pai iba tezüngzüktep atema

osang tejangja mashi.

Khan apuba ya Taliban odongtar Zabihullah Mujahid-ia jangjatsüogo aser hopta ka shi nung provincial capital 18 tashi sorkar kabu nungi rakzüka sülen iba osang ya angashir.

Taliban züngsemtem Herat yimti-i Brehostibarnü ait, koba Afghanistan anüolen Iran den arrtsü anasa lir.

Arishi küm 70 shi asütsü ta bilemsang Khan ya Taliban nung kabu nung aliba noksa aser video tem social media balala nung prokshia liasü.

Saka Taliban den

jembishinüba sülen Khan ya kidangi meyipa shilangtsü mela, ta pa indang odongtar kati ashi.

Khan dang ya "Lion of Herat" ta ajar, aser pai linük indang rara nung shilem agiba ya 1980s mapang nungi lir.

Pa July ita yakbang leni aruba ajanga yimti asoshi tebilemsü tulu temaitsü ka ama liasü aser par teloki Taliban telok tashi maitba kumdaktsü.

Afghan sorkar indang sepaitemi Herat yimti nungi kilometer 15 pilar aliba tayimtsü anendak aser Army Corps commander indang headquarters nungi ainshitsü züngzüktepogo, ta ketdangsür kati osangbener dang ashi, koba par kübok aliba tesem tatembangba alitsü.

Saka Afghan sepaitem iba tayimtsü anendak Hokulbar anüngdang 1:00 ako (par mapang) nunga liasü, ta ano osang kar ajanga ashir.

"Sorkar ketdangsür shirnoki bendanga agütsür, parnok nem timtem magütsütsü ta Taliban-i molungtepogo," ta Hashimi-i ashi.

## Algeria morok midak sendakba nung nisung 22 puogo

**Algiers, Luroi/August (Agencies):** Algeria puti otsü nung morok mi tesashitiba adoka nisung 69 asüba dak sendakba nung temolung meleme alir nisung 22 puogo.

Hombarnü nungi tenzüka linük yimtiba, Algiers anüdoklen Tizi Ouzou aser Kabylie region nung morok mi tesem aika nung jangrua arur.

"Mi kar temperature tali atsükba ajanga adok saka timba nung mapa tamajung inyaker dena lir," ta Tir Abdelmadjid Tebboune-i Brehostibarnü sangdong ka nung ashi.

"Temolung melemteti alir nisung 22 puogo, aser item rongnung nisung 11 Tizi Ouzou nung apu. Obendangbai mapa inyaktü."

North Africa linük nungya morok mi remseptsü asoshi mitkartem yoka liasü aser iba mapang parnok nisung 28 asü.

"Ibai lendong tulu lir. Saka asen tashi melaotsü. Danga province nungi chiyongtsü, mozü aser osettsüset balala tenlaba

atema pelar," ta Tebboune-i ashi. "Asenoki linük telungjem wazüka ayutsüla... Linük lungjemtsü ni nenshia ashir," ta pai ashi.

Algeria ketdangsürtemi morok mi ya ano mazüokteti lir, aser tangbo danga province tem nunga kaoloka aor.

"Mi remseptsü asoshi sorkari helicopter kar yoka lir, saka item helicopter nungya bambi buckets dang lir, anungji tzü leter meyerijang ka shi ang abentsü akoker," ta Tizi Ouzou nungi osangbener Maher Mezahi-i ashi.

"Parnoki European Union dang firefighter aircraft yoktsü asüngdang. Yashi France-i ana yokogo aser yangji tzü liter meyerijang trok nungi tenet tashi abentsü akoker, anungji tesem tamajung nung parnoki kanga junga mi remsepteter."

Hokulbarnü tashinung Spain nungi tayimtsü ana aser ano Switzerland nungia Deobarnü tashinung ka yoktsü imlar, ta Tebboune-i ashi.

## Russia nung COVID-19 tenzüker tang nisung timba asür

**Moscow, Luroi/August 13 (Agencies):** Russia nung ketdangsürtemi COVID-19 anema mozü agütsüba maparen tali temolung agüja inyakaka iba tashidak wave tasembuba lir aser ananü atonga nisung timtiba asüba osang lir.

Hokulbarnü sorkari sangdongba nung taoba ghonda 24 tsüngta nisung 815 asü aser nisung tasen 22,277 dak iba tashidak putet, ta shia liasü.

Coronavirus putetba tsütsü alima nung iba tashidak agi tamajungtiba kongshiba nung Russia ya jenjang pezübuba nung lir, aser yangi June ita tom ka nungi tashidak menatepa aoba wave tasen ka tenzüker, kong kanga mela aser kera menatepa aoba Delta variant bulua lir.

Tang tashinung COVID-19 agi Russia nung nisung 168,864 süogo, koba Europe nung

timtiba alitsü.

Ajisüaka asürtem ya asüba sülen temang rangsa asadanga mapang virus agi asü ta jangjatetba sülen ang züngok.

Saka coronavirus dak sendakba nung nisung asüba ya June ita tashinung 300,000 dak tema lir, ta statistic agency Rosstat ajanga ashi.

Russia nung nüburtemi COVID-19 vaccine nung temolung malemba jenti lir, aser Levada Center ajanga tan hopta asadanga nung Russia nung shilem 55-i iba mozü agitsü tebilemba mali, ta ashi.

Russia nung iba tashidak tali putetdak, Moscow aser region kar nungbo nisung ajak mozü ya agitsü ozüing yanglu aser Tir Vladimir Putin-i Russia nung dang mozü agitsü aiben jembia arur.

Russia nung yangluba coronavirus mozü tabu asem lir,

aser anüolen linüktem nung yangluba mozü bo malemer.

Saka Hokulbarnü tashinung Russia nung nütsüing yongsük million 146 aliba nungi million 30 dak tera agi timba mozü dose anaprong agiogo, ta Gogov website ajanga ashir.

Moscow nung virus tenokdangba meratem Hokulbarnü nungi sala tenzükerogo, aser mayor Sergei Sobyenin-i mapa inyaker shilem 30 kidang nungi inyaktü sangdonga aliba ozüing agientsüogo.

Sobyenin-i pa indang website nung ashiba agi, tashidak wara maneni menatepa aor aser linük yimtiba nung mozü kidang amunger June ita dang nungi tesadang agi tajemba lir.

Ajak senteper Russia nung COVID-19 cases 6,557,068 jangjateta lir.

## Samsung senmanger Lee Jae-yong tepuokdak nungi chiokogo



**Seoul, Luroi/August 13 (Agencies):** South Korea tepuokdak ka nungi Samsung senmanger Lee Jae-yong chiokogo aser tang pa parole (yimya tajung amshitsü tenangzüktepba nung chiokba) nung lir.

Pa tepuokdak anogo 207 liogo, shiba sübokrem aser senotsü nung ochimashi mapa inyakba mechi January ita aija tepuokdak ayutsü obendang agütsüba mapang tesadang ka dang tera agi timba lir alur.

Iba ken o nung taoba Tir Park Guen-hye dena lir, shiba sübokrem aser ochimashi ken o nung tepuokdak yua lir.

Samsung Electronics ya Lee tebou-i tenzüker aser 2014 küm nungi pa iba company indang senmanger ka ama lia arur.

Tepuokdak kima nungi Lee-i osangbener den jembiba mapang, "Ni nüburtem kanga shisabuludaktsüogo. Ni temolung taroktiba nungi tatok meshir. Nüburtemi küdak nungi imlaba ama ni nüburtem shisabulu-khuret, taitsüba angadanger. Ni meranga inyaktü," ta pai ashi.

January ita high court kati arishi küm 53 tain Lee ya küm ana ser tesadang tepuokdak ayutsü obendang agüja liasü.

Park indang tembar Choi Soon-sil ajanga tenzükerba non-profit foundations ana nem Lee-i sen million \$37.7 (43 billion won) agütsü aser iba melena yimtenren nungi pa yaria

mangatetep aliba Samsung lungjemmer pa iba company tekolakba akum, ta tai tonglojka liasü.

Iba tezüngzüktep atema sorkar meyong national pension fund teyari nüngdaka liasü.

Obendang agütsüba mapang Lee-i sübokrem amshi aser tir dang la tashi amshia Samsung nung pa tekolakba akumtsü asoshi yaritsü asüngdang, ta court ajanga shia liasü.

Sen million \$7.8 (8.6 billion won) alang sübokrem amshiba, senotsü tsütsü ochimashi aser mapa tamajung inyakba miimbangba nung Lee-i aibelena lir, ta court ajanga ngutet.

Tashidak wara agi South Korea indang rongsenketzüng aser global markets nung kongshiba asadanger Lee chioktsü telemtetba agi, ta Justice Ministry ajanga ashi.

Tir Moon Jae-in indang office ajanga sangdong ka nung, linük tejangraba ataloktsü mechi pa chiok aser ajaki angatetsüla, ta ashi.

"Vice-Chairman Jay Y Lee chiokba busemer aser anemer lir ta asenok ajaki kanga junga meteta lir. Iba maparen anemertemi angatetba ya shidak lir," ta ashi.

Ajisüaka Lee chiokba nung küm pongu shishilempaba nung tenokdangba dena lir, anungji pai company ketdangsütsü asoshi tejangja memetet.

Pa bendang limai aotsü asoshia temelaba nüngdaktü.

## PRESS RELEASE

*Dated 13th August 2021*

The Department of power will be making special effort to handle power theft and take measures to improve revenue collection in Dimapur District. For this purpose a special team headed by the Additional Secretary of Power Department will be visiting Dimapur district every fortnight to study ways and means of controlling power theft and improve revenue collection in Dimapur district. Apart from taking initiatives to control power theft, the special team will be monitoring the attendance of both office and field staff in Dimapur and Chumukedima Electrical Divisions. The team will educate the general citizens of Dimapur to accept pre-paid metering system and adopt energy saving methods. They will also educate the electrical consumers on how to pay for what they consume. It may please be noted that Dimapur district is consuming more than 50% of the power that is being supplied in the State and due to rampant power theft in Dimapur district the overall power revenue of the Power department is falling short and there is an urgent need to control the situation. As on date proper technical mechanisms are already in place and if power theft is controlled and proper energy saving methods are adopted there should be no overloading or load shedding in Dimapur district. Therefore an appeal is being made to all general citizens of Dimapur district to kindly extend your co-operation in controlling power theft so that unnecessary overloading or load shedding can be avoided and the Department can extend better service to the important commercial town of Nagaland.

Issued by DIPR

(KD Vizo), ITS

**PROGRAMME FOR CELEBRATION OF  
75<sup>th</sup> INDEPENDENCE DAY, 2021  
AT NAGALAND CIVIL SECRETARIAT PLAZA, KOHIMA**

**0600 hrs :** Hoisting of National Flag in all Government Offices, Institutions/  
Public & Private Buildings

**0850 hrs :** Review of Parade by DGP, Nagaland

**0900 hrs :** 1. Hon'ble Chief Minister arrives, hoists the National Flag,  
takes the Rashtriya Salute and inspects the Parade  
2. Address by the Hon'ble Chief Minister  
3. Presentation of Awards  
4. March Past

**PARADE CONTINGENTS :**

1. 1 Assam Rifles Bn.
2. 78<sup>th</sup> CRPF Bn.
3. 37<sup>th</sup> BSF
4. DEF, Kohima
5. 4<sup>th</sup> NAP Bn.
6. 10<sup>th</sup> NAP (IR) Bn.
7. 15<sup>th</sup> NAP (IR) Mahila Bn.
8. STF
9. Home Guards & Civil Defence
10. Nagaland Police Central Brass Band, PTS
11. 14 Assam Rifles Pipe Band

**Parade Commander :** SHRI NIKHO VENUH, NPS  
Dy. Comdt. 10<sup>th</sup> NAP (IR)

**Second-in-Command :** SMTI. MEDEMKALA TZUDIR, NPS  
Asstt. Comdt. 15<sup>th</sup> NAP (IR) Mh. Bn.

**CULTURAL PRESENTATION/ENTERTAINMENT :**

1. Vande Mataram : Song
2. Ode to My Motherland : Song
3. Teri Mitti : Song & Dance Display
4. Cultural Troupes :
  - a. Old Shena Cultural Club Kohima (Sumi)
  - b. Pochury Cultural Club Kohima (Pochury)
  - c. Zhavame Union Kohima (Chakhesang)
  - d. Aong Reju Cultural Organization Kohima (Ao)
  - e. Jakhama Youth Cultural Club (Angami)

**1200 hrs :** Governor's "At Home" - By Invitation

**EVENING PROGRAMME AT SECRETARIAT PLAZA**

**1600 hrs :** Prize Distribution

**1630 hrs :** **Band Display**  
1. Nagaland Police Central Brass Band, PTS  
2. 14 Assam Rifles Pipe Band

**Beating of Retreat**



**Pughoboto SDPDB  
senden agiogo**

**Pughoboto, Luroi/August 13, 2021 (TYO):** Hokolbarnü, ADC Office, Pughoboto nung Pughoboto Sub-divisional District Planning & Development Board senden amenba den külemi HSLC, HSSLC, University toppers aser NPSC tatidang nung takok angurtem nem tenüngsang agütsüba sentong ayonga agiogo. Iba senden nung Pughoboto SDPDB aser MLA Y. Vikheho Swu menden liasü, ta sangdong ajanga metetdaksü.

Iba senden agiba mapang, teloki Pughoboto sub-division nung light junga maruba indang onük benoka jembi aser Pughoboto nung SDO (Power) posting atema Power department dang tezüuba ajanga metetdaksü asoshi telok bangjemtep. Lenmang yanglushitsü atema senotsü (fund) lenmang angutsü teimla nung, Swu-i tim Department dang lenmang junga yanglushitsü aser senotsü timi ketdangsüa amshitsü mepishia liasü.

ADC, Thungchanbemo Tungoe-i, August 15, 2021 sülen pei pei tesem nung tim staff dang Covid-19 tendangba maparen achaayangtsü asoshi osang agütsüta ta officers-in-charge ajak dang tuyuogo, koba Covid-19 test maparen ya ADC Pughoboto office nungi tenzüksü.

Taruba senden nung Forest department dang Power point ajanga departmental inyakymtem metetdaksütsü asoshi tetuyuba agütsüogo.

Kasa anogo, MLA, Y. Vikheho Swu-i tesayur, tsürabur, takok angur kaketshir aser Aphuyime achievers award angurtem nem tenüngsang agütsü; aser pelaba temaitsü sayua kaketshirtem nem kulikaket aser senpet agüja liasü.

Tsüraburtemi pei chirnurtem jungdaksütsü asoshi meranga inyakba aser SSA team-i nungitba atema pelaba lemsatepba mapang, tarutsü nunga takok tuluba ajangzüktetsüsa maneni meranga inyaktsü asoshi Swu-i parnok ayongzüik.

Teloki, HSLC/HSSLC examination 2021 nung topper - Kipitoli Sheqi (HSSLC nung top 4), Anquvili Swu (HSLC nung top 20), Lucy Swu, 2019 küm M.A nung Gold medal (Nagaland University kübok department of Hindi nungi) aser Bento L. Shohe (Accountancy Honors, 2020 nung Gold medal) nunger nem tenüngsang agütsü.

NPSC Exam 2021 nung Aphuyemi award angurtem - Viqheshi S Futhena aser Nikali V Sema naprongla nem Swu-i kulikaket agütsü. Board-isa Pughoboto town nungi HSLC tatidang nung takok shilem 100% anguba school ana - Mission School aser New Foundation School nem sempet agüja liasü.

SAKK President, top holder aser tesayur temi iba sentong nung o jembia liasü aser tenüngsang agütsüba sentong ayongzüikba atema parnoki Pughoboto SDBDP züngsem dang pelaba lemsatep.

Iba sentong nung ADC Pughoboto, Thungchanbemo Tungoe menden liasü ta kasa sangdong nung shia lir.

## Küm 16 sülen England-i Pakistan nung asayatsü: PCB

**Karachi, Luroi/August 13, 2021 (Agencies):** October nung England cricket team-i Pakistan nung Twenty20 international ana asayatsü. 2005 küm linük nung team-i cricket asayar külen nungi taküm mezüing Tour nung parnoki shilem agir asütsü, ta Hokolbarnü Pakistan cricket tekolakpurtemi metetdaksü.

"Twenty20 internationals atema October ita England tebur team Pakistan-i arutsü. Asaya anaprongla October 13 aser 14, 2021 nü Rawalpindi kübok Pindi Cricket Stadium nung asayatsü," ta Pakistan Cricket Board (PCB) sangdong ajanga metetdaksü.

Ano September ita New Zealand cricket team Pakistan nung asayatsü sentong lir. Küm 18 sülen Kiwis cricket team-i Pakistan nung mezüing cricket asayatsü. Iba sülen taruba ita tenet nung West Indies aser Australia team anaprongla Pakistan nung asayatsü asalentong yangludat.

2009 küm Lahore nung kiralongrar temi Sri Lanka



team mener oya aliba bus ka amakba sülen, küm aika International team temi Pakistan nung asayatsü arendaka/tsüba aruogo.

Ajisüaka, tesüba küm ishika nungi Pakistan nung security' tsütsü temelenshi adokba ajanga iba linük nung International cricket tanaben tenzükshiba nguogo. Taoba küm trok nung Zimbabwe, Sri Lanka, West Indies aser South Africa team temi mapang balala nung Pakistan Tour nung shilem agiogo.

2005 küm England-i Pakistan Tour nung tesüba shilem agiba nguogo. 2012 aser 2015 küm Pakistan-i

England den asayatsü atema United Arab Emirates nung ayongzüka asayaogo.

"England tebur aser tetsür team anaprongla October 9, 2021 nü Islamabad tonga arutsü aser October 14 - 15, 2021 nü team anapronglai Twenty20 international asayatsü," ta PCB-i ashi.

Iba sülen, Pindi stadium nung October 17, 19 aser 21 nü England tetsür team-i Pakistan tetsür team den one-day international asem asayatsü.

\* **England tetsür aser tebur team asayatem:**

- Oct 13 - Pakistan women v England women; Pakistan men v England men (T20I double-header)
- Oct 14 - Pakistan women v England women; Pakistan men v England men (T20I double-header)
- Oct 17 - Pakistan women v England women, 1st ODI
- Oct 19 - Pakistan women v England women, 2nd ODI
- Oct 21 - Pakistan women v England women, 3rd ODI

## National Sports Awards sentong atsülanger

**New Delhi, Luroi/August 13, 2021 (Agencies):** National Sports Awards sentong, koba küm shia August 29' nü agir, taküm (2020) iba sentong atema anogo atsülangtsür. Aruya aliba Tokyo Paralympics nung India nungi shilem agitsüpur para-athlete tem jenjang asadangshitsü asoshi Sorkar ajanga selection panel dang mepishiba sülen iba sentong anogo atsülangtsü lemetet.

Tokyo Paralympics ya August 24 nungi tenzüksü aser September 5, 2021 nü tembangtsü.

Sports Minister Anurag Thakur-i ashiba agi, award angutsüpur athlete tenüing shimtsü atema achaayanger selection panel dang iba osang metetdaksüogo, saka iba selection maparen tenzüka maodang, parnoki mapang tatsüka atatsü bilema aliba

metetdaksü.

"Taküm atema National sports award committee tentetogo, saka Paralympics asayamung asayatsü lir asünung, onoki Paralympics nungi takok angur tenüing bendenlokner. Parnoki (para athlete) iba asayamung nung tajungtiba shilem agitsü imlaa atar," ta National Youth Awards sentong nung Thakur-i ashi.

Linük nung küm shia August 29' nü India President ajanga Khel Ratna Award, Arjuna Award, Dronacharya Award aser Dhyana Chand Award agitsü. Taoba mapang India nung hockey asayar mongin Major Dhyana Chand asoba anogomung nungtem nung National Sports Day amunger.

"Taoba küm ama, taküm National Sports Day sentong ya virtual ajanga agitsü akok," ta ministry sangdong ka ajanga

metetdaksü.

Anaben tashi anogo atsülanga arur sülen, July 05 nü National Award atema maparen tembang. Covid-19 wara süshia maoba ajanga, applicant tem dang pei sasa online nung tenüing agitsütsü asoshi metetdaksü, saka national federation-ia parnok tebilema agitsüogo.

Tawa tembangba Tokyo Games nung Indian contingent-i shilem tajung agiba nguogo. Iba asayamung nung, athlete temi gold medal ka, silver medal ana aser bronze medal 4 densema medal tenet nguogo.

Aruya aliba Tokyo Paralympics atema India nungi para-athlete 54 agi shilem agitsü. Taoba Paralympics nung India athlete temi gold medal ana, silver medal ka aser bronze medal ka densema medal 4 angu.

## Tokyo Paralympics nung terepranger memelatsü

**Tokyo, Luroi August 13, 2021 (Agencies):** Japan yimtiba - Tokyo nung novel coronavirus wara puteter timba küma aoba azüoktsü asoshi lockdown aliba asadangteta, aruya aliba Tokyo Paralympic Games shilem timbaka terepranger medeni ayonga asayatsü asalentong yangludat, ta Hokolbarnü sangdong ka ajanga metetdaksü.

Brehostibarnü, Tokyo asayamung ayongertem senden ka agiba mapang, Olympic Games ama, August 24, 2021 nü nungi tenzüka asayatsü aliba

Paralympics nunga asaya shilem kar nung tereprangertem tatakzük ka dang melatsü asoshi bangjemtep. August 08, 2021 nü Olympic Games tembang aser iba asayamung shilem timbaka terepranger medeni asayaogo.

Paralympic asayaba tesem - Shizuoka, central Japan nung terepranger 5,000 dang tajemba melatsü. Iba den külemi, asayamung kar reprangdaksütsü asoshi Tokyo achaayangertemi school tanurtem jaoktsü asadangdar, ta sangdong nung shia lir.

Tokyo Paralympics dak

sendakba nung asayamung achaayangertemi osang magitsü arur sülen, parnoki iba Games atema telemtetba ka agitsür asütsü. Taoba mapang, Japan ketdangsurtemi, Tokyo Olympics temer sülen ang onoki telemtetba ka agitsü ta shiogo.

Aruya aliba Paralympic tetoktepba nung, swimming, table tennis, wheelchair fencing aser basketball dena lir. Iba Games' nung para athlete 4,000 tema den paraplegia temi saisapong balala nung shilem agiba angutsü.

## T20 World Cup nung Aaron Finch asayatsü



**Sydney, Luroi/August 13, 2021 (Agencies):** Australia indang T20 format captain Aaron Finch temekok achjilen surgery agiba sülen, October aser November tsüingda asayatsü aliba Twenty20 World Cup asayamung nung pa lenisüba kübok Australia tebur team-i shilem agitsü, ta Hokolbarnü Cricket Australia sangdong ajanga metetdaksü.

Taoba ita tatemlen St Lucia nung West Indies aser Australia na tsüingda T20 asayaba mapang, arishi küm 34 tain Aaron temekok yirua liasü aser anogo 14 quarantine' nung amungba sülen, surgery agitsü atema pa talidaki (Australia) meyipa ao.

Cricket Australia-i ashiba agi, Aaron temekok teloktep (cartilage) yanglushitsü atema Brehostibarnü Melbourne nung operation agiogo aser hopta 8 nungi 10 tsüingda iba timtem nungi pa taneptsü angutsü inlar.

T20 World Cup nung team atema Aaron asayatsüla.

India nung Covid-19 wara süshia maoba ajanga, 7buba T20 World Cup asayamung India nungi belener aotsü lemetet aser October 17, 2021 nungi tenzüka United Arab Emirates aser Oman tesem nung lemsar iba asayamung ayonga asayatsü sentong lir.

West Indies Tour temer sülen Bangladesh nung T20 series atema Matthew Wade captain meshim dang, iba Tour (West Indies) tanüingba asayatem atema Alex Carey captain ama shim. Australia-i iba T20 series 4-1 agi Bangladesh makok.

Australia-i T20 World Cup asayamung khen danga kokdanga mali. 2010 küm West Indies nung T20 World Cup final asayaba mapang parnoki England makok ajanga runners-up nung tembang.

## Thomas-i India tetsür football team head coach inyaktsü



tongteta asayaogo.

Nigerian Women's National team atema Dennerby-i Head Coach ama inyakogo aser pa tawabangba kübok Super Falcons-i 2019 FIFA Women's World Cup tongtet. Iba den külemi pa ajanga Nigeria tetsür team-i AWCON Award 2018 angu aser Nigeria nung pa nem 2018 Coach of the Year' award agüja liasü.

**New Delhi, Luroi/August 13, 2021 (Agencies):** Sweden nung Thomas Dennerby-i India tetsür senior national team indang head coach inyaktsü, ta All India Football Federation (AIFF) sangdong ka ajanga metetdaksü. January 20 nungi February 6, 2022 tashi India nung Continental Championship asayatsü.

Dennerby, shiba Indian U-17 Women's World Cup squad indang coach liasü, pai küm 30 tashi National squad balala nung coach inyaka aruogo. UEFA Pro Diploma angur Dennerby teyari ajanga 2011 FIFA World Cup nung Sweden indang Women's National team-i tasembuba jenjang ajangzükter aser 2012 London Olympics nung parnoki quarter-final

"Kü dak temolung lemetetba atema All India Football Federation dang kanga pelar. Indian Senior Women's National team indang Head Coach inyaktsü maongka anguba ya konang ka ama lir," ta Dennerby-i metetdaksü.

"India nung lidangogo aser parnok (India tetsür team) dak sempet tulu aliba asadangteter. AFC Women's Asian Cup atema parnok tim nung anitsü asoshi tayongzükba tulu asütsü," ta pai ashi.

AFC Asian Cup temer (February 2022) sülen, Dennerby-i tanaben Indian U-17 World Cup squad indang coach inyaktsü. Iba asayamung matem tashi, Assistant Coach Alex Ambrose kübok U-17 tetsür team training agitsü.

## BILEMDANGANG

"Ochimashi rongsen temoatsü ama agira timtem adoker."